

Disparonan, arma di candela y arma blanco

Durante fin di siman por a tende un biaha mas di disparonan cu armanan pisa di candela.

Conversando cu coleganan riba esaki, a bin dilanti e cantidad di arma di candela cu ta circulando riba nos isla y cu hopi hoben tin arma (pa proteccion manera nan ta bisa) y hopi biaha no sa e potencialnan di e armanan aki, ni sa aspectonan tecnico di esakinan, locual ta un peliger pa nan mes.

Ademas di e armanan, tin hobennan cu ta cana rond cu arma blanco, cuchu di tur tamaño (pa nan proteccion, manera nan ta bisa). Ta riba esaki mi kier comenta algo.

TIRA E ARMA AKI AFO PA MI

Diasabra madruga, saliendo di DIARIO, mi a topa dos colega hoben di mi conversando cu un hoben cu mi lo yama aki "Dube". (di Lucky Dube). Despues di a scucha e hoben pa basta largo, mi a bise: "**scuchando bo, e manera cu bo ta papia, e palabranan y frasenan cu bo ta expresa, mi kier puntrabo: ki dia bo a tuma bo ultimo hala di marihuana?**"

El a keda asombra y a contesta: "**Mi ta clean 4 luna caba**".

Mi a bise cu mi no ta reproche nada y a mustre mi paki di cigaría:

"Mira aki, mi ta huma tanto cigaría pa dia, y mi no ta un 'drogadicto' pa hende pasobra cigaría ta legal te ainda. Pa bo informacion, mi ta mas drogadicto cu bo, y bunita ta cu bo tabata tin e curashi y bon voluntad di laga bo marihuana un banda 4 luna caba, y ami no tin e forza pa laga e cigaría aki ni un dia. Pesey mi ta kita sombre pa bo."

El a keda mirami asombra y a ofrecemi un cervex, como cu su dos amigonan sinta poco mas leu dilanti Compra, tabata tin cervex cu nan. Mi a gradicie bisando cu mi no sa bebe, y mi no ta componde con pa esey si mi tin e bon voluntad di lague un banda y e cigaría no.

Mi no ta conseña ningun persona pa huma, ni pa cuminsa cu e prome cigaría di nan bida.

"Ami ta un DROGADICTO legal, y sa kico ta kico, pero no hinca bo culpa den esaki."

Den e conversacion, (e dos amigonan a bini cerca mientras tanto) un cortico a habri boca bisa algo, y mi di cune.

"No play tough aki. Si bo a lesa mi comentario awe, mi a splica cu e tough-guyman ta den santana y e cobardenan ta cana rond disfrutando di nan bida."

Mi a pone nan un banda y a pidi nan pa scuchami bon.

Mi a conta nan mi historia di bida. Loke mi ta conta hobennan den KIA tambe ora mi wordo invita pa bay papia eynan.

Nan a keda boca habri, y no por a kere.

"Puntra boso mayorman y bo wela y welonan, y lo boso haya sa", mi a bisa nan.

ARMA BLANCO A CAY DEN MI MAN

"Dube" despues di un rato a bin dilanti cerca mi.

"Loke meneer a conta a traha riba mi", el a bisa cu awa den wowo y a puntrami si mi kier haci e un favor.

Mi di cune: **"si ta locual mi a mira, mi ta hacibo e favor ey!"**

Mi a keda wak su cintura, y el a keda mirami.

Despues di un rato el a hala su camisa un banda, y a saca loke nos ta yama **"un mama di cuchu"**.

Tabata e sorto di cuchu di caza, di mas o menos 15 cm largo, cu un zig zag estilo diente den e parti di corta, y e no tabata tin su cabo.

E hanchura tabata te na mas o menos 4 cm.

"Hacimi un favor meneer, tira esaki afo pa mi!" el a puntra.

Mi a tuma e cuchu y a primintí'e cu mi lo tire afo pe.

Esun cu a habri boca anteriormente a puntra pa mi dune e cuchu.

Mi a puntre si ta di dje, y el a bisa cu no, y cu ta di **"Dube"**.

Mi a nenga di dune e arma y a splica cu si mi haci esey, y cualquier cos pasa despues, mi ta mes of mas culpabel cu esun cu a usa e arma, y mi castigo lo ta mescos of mas cu esun cu a use tambe etc.

Nan a componde esaki.

Ta despues cu mi a bay, mi a bin tende kico ta tras di e arma aki.

HOBENNAN TA CANA ARMA

Mi a bin tende despues cu e 3 hobennan aki ta di Dakota, pero cu nan no ta pertenece na e asina yama **"gang"** di Dakota, cu ta den noticia keto bay, cu e asina yama **"gang"** di Madiki.

Nan, y otronan, ta cana cu arma, pa temor di wordo ataca pa e **"gang"** di Madiki, ya cu esaki a tuma lugar caba, cu otronan cu no ta pertenece na **"gang"**, pero si ta di Dakota.

Kizas vice versa ta mescos, esta cu tin hobennan di Madiki, cu temor di

wordo ataca pa esnan di **"gang"** di Dakota, djis pasobra nan ta di Madiki, cu tambe lo ta cana cu arma.

Ta e gruponan o hobennan cu ta cana hunto, cu ta ser califica como **"gang"** of miembronan di **"gang"**, ta esnan cu nan atencion mester ser hala, y si ta posibel, busca tur di nan, trece nan hunto, y pone fin na e asunto di **"gang"** aki.

Laga nan cera paz y publica un potret di grupo di nan hunto.

Mester bini un fin na e asunto di **"gang"** riba nos isla.

Esnan envolvi no sa den ki peliger nan a hinca nan grupo y ki peliger nan ta causa despues pa otronan tambe.

BAN BIAHA CONOCE MUNDO

Lesando diasabra e experiencia di biaheronan di Aruba na Colombia, y lesando un remitido cu a drenta pa wordo publica awe, di otro experiencia di Arubiano cu a biaha pa Colombia, mi conviccion ta keda, cu ami si no ta haci e biahenan aki pa paisnan unda bo ta wordo trata di e manera ey.

Mi a bay Colombia varios biaha, pero den biahenan di promocion periodistico, nunca riba mi mes.

Mi no ta biaha pa Colombia pa e mes hechonan publica diasabra y ayera. Terrorismo di gueriyaeronan, narcotrafico y su crimennan, asunto di sicaricion, criminalidad halto na Colombia, no ta afectami, pero si e trato di aerolineanan y di funcionarionan di orden y na aeropuertonan.

Ora bo lesa di e trato aki, bo gana di bishita e pais ta kita y ta hopi invitacion mi ta haya pa bishita Colombia, y no a acepta ningun, djis pa loke ta yega na mi conocimiento keto bay di e trato di forzanan di orden, y e trato cu companianan aereo cu ta bula pa Aruba for di e pais ey ta dunabo, ora tin un of otro problema.

Venezuela tambe ta un di e paisnan aki.

A durami 30 aña prome cu mi a bishita Venezuela pa di dos biaha, ya cu for di mi prome biaha, mi a bisa cu mi no ta bay mas.

Despues di 30 aña mi a tuma curashi y bay atrobe y pa colmo, ni mey ora mi tabata tin cu mi a yega mi hotel, cu mi a wordo atraca riba caya, den compania di mi señora y yiu (baby e tempo ey).

Mi a pasa despues den un experiencia masha amargo na man di polisan, di un warda di polis pa otro, cu un trato comosifuera ta abo a atraca bo mes.

Despues di esey mi a bay como tres biaha mas pa asuntonan di trabao of medico, pero di mi mes pa bay vacation etc. mi no ta bay.

No pa motibo di e atraco, ni pa motibo di crimen den e pais.

Pa motibo cu mi no ta gusta e manera cu bo ta ser trata pa autoridadnan na aeropuertonan, ni na Maiquetia, ni na Valencia, ni na Barcelona, ni na Punto Fijo.

Si nan por ranca delaster cent di bo - ora cu aparentemente nan mester di placa den saco— nan ta haci esey.

E experiencia aki tambe mi a pasa aden na Maiquetia.

Nan ta tenebo atras cu un of otro excusa, ponebo warda te ultimo minuut prome cu subi avion, y si bo **"los cartera"** duna nan, e ora ey bo ta sali bay subi avion mes ora, y no por reclama nan trato, contento cu bo ta den avion.

Republica Dominicana tampoco mi a bishita pa mes motibo di locual mi ta tende di aeropuerto y di riba caya di parti di funcionarionan di orden. Na San Juan, Puerto Rico, y Miami esaki por pasa ainda, mescos cu na New York, y Chicago. Aki ta e cara di funcionarionan ta kita bo deseo di bolbe. Nan siquiera no ta core **"tras di bo cartera"**.

Curacao y Bonaire, mi ta bay wowo cera mes. Eynan nan sa con pa trata cu hende na aeropuerto, mescos cu na Aruba ora di sali y drenta.

Na Schiphol, Hulanda, mi cara lo ta muestra di ta di **"Cosa Nostra"**.

Ultimo 5 aña mi a pasa Hulanda di transito casi anualmente, y TUR ora (cu excepcion di mi ultimo biahe, e aña aki), manera mi baha di avion pa sigui despues cu otro vuelo, of pa pasa algun ora den transito, mi ta hayami cu un funcionario di imigracion, homber of muher, ta cana banda di mi, y ta cuminsa haci pregunta (na un manera decente)..

"Pa cuanto tempo bo ta keda; unda bo ta bay; kico bo ta bay haci; laga mi mira bo papelnan; kico bo tin den saco of den handbag", te ora cu nan bisabo, **"feliz vuelo"**.

Na Hulanda sinembargo, mi a sintimi na cas, hasta cu e actitud mencion, pasobra nan sa con ta trata cu hende.

Suerte ta cu na Hulanda nan no a pone e cacho pa cana banda di mi.

E ora ey si lo mi a **"coi awa blauw."**

"Fikkie" lo a haya sa mes ora cu aki tin un drogadicto **"clean"** pasobra e ta huma cigaría..

Mi sanger ta yen di droga, yen di nicotina.

Toch mi no ta ser considera un drogadicto.

Si tabata **UN MARIHUANA SO** pa dia..!!!!

Juby Naar



www.diarioaruba.com

The way business moves!

DIARIO
Online
E Matutino di Aruba